

Monday, February 10, 2025

Time - 2:30pm - 2:35pm

REGIONAL NEWS BULLETIN

PARIKSHA PE CHARCHA 2025

Prime Minister Narendra Modia chuan vawiin chawhma dar 11 ah zirlai naupangte nena inkawmna hun Pariksha Pe Charcha programme a hmang a. He hunah hian zirlai naupang bakah nu leh pa leh zirtirtute an tel a ni.

Prime Minister chuan he hunah hian zirlaite an hriselna tur leh thlai chi hrang hrang leh eitur hrisel ei pawimawhna chungchang a sawi a, Exam inbuatsaihna, rilru hahna leh mimal hmasawn zelna turte sawipuiin zirlaite chu exam hun a huphurh lutuk lo tur leh huphurhna hneh theih dan chungchang a sawi a, ei leh in hrisel pawimawh zia a sawi uar hle a, mut hun diktaka muta pawimawh zia sawiin, zirlai te hnen ah grade hniam in an rilru a tihbuai thin thu sawiin, heng avanga huphurh lo tur leh huphurhnate hneh a inbuatsaih tur leh mahni inhmachhawn zel turin a chah a ni.

Pariksha Pe Charcha programme 8th Edition programme hi Akashvani, Doordarshan, PMO Youtube Channel leh Union Education leh Information and Broadcasting Ministry social media channel ah te tihchhuah a ni.



PARIKSHA PE CHARCHA PARTICIPANTS

St Pauls Higher Secondary School zirlai Lalnunsangi Ralte, Pawl 10 zirlai chuan kum 2025 Pariksha Pe Charcha 8th Edition-a Prime Minister Narendra Modi nen an inkawm chu hlawk thlak atih thu leh ram hmasawn nana tha thawh turin kawng pawimawh tak a zirtir tih a sawi.

Prime Minister Narendra Modi hova zirna chunchanga inkawmhona Pariksha Pe Charcha ah hian ramchhunga zirlai hrang hrang thlan chuah te an tel thin a, kuminah hian zirlai 100 chuangin Delhi an pan hnuah zirlai 36 chu Prime Minister nena inkawmhona ah hian an tel a, Lalnunsangi Ralte chuan Prime Minister kawm tura thlan ani chu lawmawm atih thu sawiin hun hlu taka a tel ve thei chu lawmawm atih thu a sawi bawk.

Prime Minister leh zirlaite inkawmna ah hian Narendra Modi chuan ramchhunga zirlai naupangte chu exam avanga an rilru hahna chhawk zangkhai zawngin hun a hman pui a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



FIRE PREVENTION WEEK

Vawiin khan Mizoram hmun hrang hrangah "Kangmei Ven Hapta, 2025" hman tan a ni.

Kangmei ven hapta hi Aizawlah chuan Vanapa Hall ah Pu H.Lalengmawia, Commissioner & Secretary chuan hman puii ramkang tur ven chu mi tin mawhphurhna a nih thu leh chumi atana ngaihtuahna senpui turin kalkhawmte chu a sawm a. Ramkang chu khawvel pum harsatna a nih thu leh chumi avanga ram rang hrang pawhin kangmei venhim hna thawktute puala ni serh bik an hman thindan te a tarlang a. Nungcha leh ramngaw bakah boruakte venhim chu mitin te'n, khua leh tui tha ni tura an mawhphurhna a nih thu sawiin Mizoram chu India ram state-te zingah ziak leh chhiar thiam tamna a nih angin, dan zawm kawngah entawn tlak ni tura beisei an nih thu a sawi a, Kangmei ven kawnga Department hmalakna sawiin kalkhawmte chu Kangmei ven kawnga mipui vantlang zirtirna tha lehzual a awm theihna tura ngaihtuahna senpui turin a sawm nghal a ni.

Fire Prevention Week hi District dangah pawh hman niin Lawngtlai District ah chuan Adviser to CM Dr. Lorrain Lalpekliana Chinzah chuan hmanpuiin Ram kang chuan thing leh mau bakah ramsa leh nungchate chenna a tichereu a, leilungin a hâanna hlahin, tui hna nasa taka tihkiamin a awm thin a, a tuartu zingah mihringte pawh an tel thin a ni, a ti a. Mizorama ramkang tam zawk chu mihringte vanga chhuak a ni tih tarlangin, hei hian fimkhur a tul zia a tilang chiang hle a ni a ti bawk.

Saitual District ah chuan DC Dr. Lalingura Tlau chuan ram changkang apiangin an ram ngaihhlut nachang an hria tih sawiin, Mizote pawhin a neitu rilru puin kan ramte chu humhalhin, kangmei laka venhim a tul a ti a, kangmei chu thunun a nih chuan thil tangkai tak a nih rualin, thunun loha a awm chuan thil hlahawm tak leh chhiatna tam tak, thihna hial pawh thlen theitu a ni tih a sawi bawk.



NATIONAL DEWORMING DAY

Naupang kum 1 atanga 19 inkar ten rulhut an pai lohna tura rulhut hlo pek beihpui leh rulhutin a nghawng thalote inzirtirna hun, National Deworming Day (NDD), 2025 thawhkhatna chu vawiin khan Champhai leh Khawzawl District ah hman a ni.

Champhai ah chuan Bawrhsap Pu VL Remliana chuan India sawrkar kalphung chu mipuite zalenna nekcheptu ni lovin mipuite hmakhua ngai a ruahmanna siam thin tu a ni, a ti a. Sikul naupangte chu sawrkar ruahmanna te chhawr t̄angkai a, hmasawna atana lo hmang zel turin a chah a ni.

Pu VL Remliana chuan hriselna a t̄hat loh chuan hlawhtlinna chan a har thin a ni tiin, zirlaite chu an taksa uluk taka vawng a, hriselna ngaipawimawh turin a chah a. He mi kawngah hian zirlaite chu mithiam te thu sawi pawm thiam a, zawm tum t̄heuh turin a chah bawk a ni.

Khawzawl District ah chuan Govt Little Flower School ah Bawrhsap Pu K. Vanlalthiana hoa hman a ni a, Khuallian chuan naupang kum 1 atanga kum 19 inkarin rulhuthlo kim takin ei vek se a duh thu a sawi a, Khawzawl district chhunga naupang ten kim taka rulhut hlo an ei theih nan NGO hrang hrang te pawh tulna apiangah hma la turin a ngen thu a sawi bawk.

National Deworming Day (NDD), 2025 thawhkhatna hi vawiin February ni 10 atangin February ni 17 thleng neih tur a ni a. Hemi hun chhung hian District chhunga zirna in hrang hrangah rulhut hlo (Albendazole) a huhovin ei a ni dawn a, zirna ina inziak lut lo te chu ASHA-ten an inah kal chilhin an pe dawn a, a ei tur ten an ei veka tumah hmaih an awm loh nan a thualnawmna (Mop Up Day) hi February ni 17, 2025-ah neih leh tur a ni. National Deworming Day thawhnhina hi August thlaah neih leh tur a ni ang.

